



13
1877

特

門 九 5
號 3537
卷 13

重修揚州府志卷之二十一

鹽法志

古者宿沙初作煮海鹽夏書有青州之貢周官有鹽人之掌至管子遂以鹽充國用漢初吳王濞立國廣陵煮海爲鹽無賦而用饒此兩淮鹽利見於載籍之始也武帝時鹽鐵領於大農丞於是私鬻之禁至唐以江淮爲財賦之淵裴耀卿第五琦劉晏杜佑諸人相繼爲轉運使鹽利居天下賦稅之半宋立中鹽之法元立買引之法明初召商納粟中鹽嘉靖以後一壞於鄆懋卿再壞於魯保三壞於魏忠賢而鹽法不可問矣我



朝監邊中海支之失革去常股存積諸名目而歸之綱食

一切引課悉輸

天府去其繁苛加以優恤引窩聽商得自為業口根窩其
屆年支違者亦聽商得轉相撥售日年窩順治初部頒
引額剖明之每引四百斤為二百斤九年派定淮南淮
北每歲引額至若行銷有界課程有定經費有常已詳
鹽法志中其有關於揚屬者具載如左

引課

揚州原食綱鹽後改食鹽食鹽者於單鹽過橋壩時抽
點另堆俟鋪戶執引票以支賣綱鹽者乃明萬厯四十

六年巡鹽御史龍遇奇所建兩淮至今綱食分行陸

縣志食鹽條例明初揚州額鹽三萬引照縣派行萬厯
間鹽壅課缺增設疏理鹽法道商人秦晉興吳昭慶等
條陳謂食鹽數多有妨綱鹽儀徵通江或有借行官鹽
之名縱其行私之害者因盡革令暫食功績鹽俟私鹽
盡掃別有處置之法嗣
至淡食雖屢告不復兩淮鹽引

國朝仍明之舊惟剖一為二每鹽一引額定連包索二百

二十五斤又解費納銀一分六釐加鹽二斤康熙十六
年給事中余國柱請革去割沒溢斤公罪等名色於額
引攤派每引加鹽二十五斤加課二錢五分又自康熙
三十八年起至五十二年節次加添河餉銅斤織造等
銀三十二萬七千六百二十兩每引加鹽四十二斤雍

正四年加鹽五十斤免其增課乾隆十三年於引額之外加鹽十斤亦免增課十六年又加十斤今兩淮綱食鹽每引以三百六十四斤爲額又順治九年定淮揚食鹽照綱鹽例不分餘銀引價每引剖一爲二納銀五錢二分五釐行鹽三百三十五斤淮揚計七萬三千四百一十九引零是年又將食鹽分派地方行銷江都縣認人丁又將江都引改派一萬於寧國府銷運計江都縣銷二萬六千七百一十引康熙八年奏准定食鹽引價俱照綱鹽六錢七分五釐零增課銀四千十七兩八錢六釐七絲五忽九微雍正十年奏定江都食鹽照綱鹽例一體相重乾隆八年定高郵州每年派銷二千五百引寶應縣每年一千引十一年於高郵額引內撥出六百引寶應額引內撥出四百引歸泰興縣行銷作額揚州舊額淮南食鹽三萬二百一十引今額二萬九千二百一十引徵銀二萬五千四百二兩七錢四分一釐三毫五絲

江都縣食鹽一萬三千三百五十五引每引徵正課銀八錢七分二釐九毫五忽共徵銀一萬一千六百五十七兩六錢四分六釐二毫七絲五忽

原派三萬六千七百一十引後改派

一萬于寧國府仍額二萬六千七百十引
雍正十年分設甘泉縣將額引各半分銷

甘泉縣食鹽一萬三千三百五十五引每引徵正課銀

八錢七分二釐九毫五忽共徵銀一萬一千六百五十

七兩六錢四分六釐二毫七絲五忽

按揚州為淮南綱食引鹽之門戶而

私鹽易聚官引難銷四屬中江甘猶甚康熙十年巡鹽

御史特席納疏言江都鹽壅應行庚戌一綱二萬六千

七百一十引之內撥派七千引改于寧國和含等處食

地分銷一年下部議行乾隆十一年鹽政吉慶奏淮南

江都甘泉等九縣壅壓引鹽十萬三千一百三十引遵

照雍正二年題定之案派撥與綱地行銷照綱輸課又

二十四年鹽政高恒奏江都甘泉高郵寶應等十六口

岸壅積食引請循例改撥綱地融銷得旨高寶

等十四州縣著照該鹽政所請行其江都甘泉二縣照

部議不准撥綱行銷三十五年總督高晉奏准江都甘

泉二縣食引難銷請自庚寅綱起通出五分融銷地又

三十九年鹽政李質穎以江甘二縣帶銷如故請將通

出五分食引永遠融綱奏奉部議仍准以五分暫為融

綱俟積鹽銷完之後再試一年奏報核辦迨五十六年

鹽政全德以淮南口岸漸有起色奏准將江甘五分融

引收回本岸以復舊額五十八年鹽政巴寧阿復奏江

甘應銷鹽引撤回本岸之後積鹽愈多實難照額行銷

自癸丑綱起仍以五分畱運本岸五分融銷綱地下部

議行

高郵州一千九百引每引徵正課銀八錢三分四釐九

毫八絲共徵銀一千五百八十六兩四錢六分二釐

寶應縣六百引每引徵正課銀八錢三分四釐九毫八

絲共徵銀五百兩九錢八分八釐

儀徵泰州東臺興化四州縣逼近鹽場例不銷引

雍正十二年兩江總督趙宏恩題覆儀徵縣乃淮南

綱食引鹽掣摯之所每年過所鹽斤多至一百三十
四萬引居民皆藉拋撒泥鹽食用貧難小民又賴掃
鹽資生今若同高寶等州縣行運食引則拋撒泥鹽
無從銷售必致透漏私販卽每年所獲功績鹽斤亦
難售價該縣烟戶每年需鹽九十萬斤應將稱掣拆
包剝運等處貧難男婦所掃泥鹽分設商店收買並
同功績鹽店一例售食以免行引嗣經部覆令將作
何收買作何同功績鹽店一例銷售並有無完課之
處分晰報部乾隆元年題覆現據商郝遵三開設官
店三處逐日收買掃鹽每斤定制錢五文彙發城內
天寧寺古樓橋坊官店並同功績鹽一例轉售泥鹽
原係商人已經完課正引內之拋撒並無重複納課
雍正十二年兩江總督趙宏恩疏言前督臣尹繼
善條奏兩淮鹽政部覆令將場竈坐落之州縣酌畱
食鹽聽老幼貧難挑負售賣之處一併妥議具題今
查淮南北不銷官引州縣共一十二處內如通州海
州泰州興化等皆濱臨江海民竈多以捕魚爲業食
鹽之外又有醃切一項先經前署督臣史貽直奏將
通州之呂四金沙二場鹽斤以六分歸垣四分畱竈
以濟醃切民食經大學士議令將沿海州縣有與通

州相類者一併詳查定議但前議四六分歸原係約略之數茲臣細查應按戶口及醃切多寡酌畱鹽斤泰州戶口二十二萬零連醃切每年酌需鹽二百四十九萬五千八百一十二斤應於該州境內之東臺何垛等場餘鹽酌畱興化縣戶口一十二萬七千零連醃切每年約需鹽一百四十三萬五千三百三十一斤應於該縣境內之丁溪小海等場餘鹽酌畱各州縣酌畱之鹽若止令附近場竈貧難挑賣恐寫遠村鎮不能遍及或致價貴病民應令州縣于城市鄉村各地方查造實在貧難小民花名年貌移發坐落境內場員置造循環號籌分別遠近限定日期循去環來輪流倒換其鹽毋許過四十斤之數

巡緝

欲通官引必絕私梟揚州所屬泰州東臺興化逼近鹽場儀徵乃掣摯之地竇應高郵甘泉江都皆淮南鹽引所必經無一非私梟出沒之區遊巡督緝實揚州之要務向例各場及經由隘口置設巡役皆商人招募州縣本無管束之責雍正十年總理鹽政尹繼善檄行運司詳定淮揚二屬州縣場司共設巡役四百六十四名巡船八十九隻舵工水手一百八十六名歲給工食燈油

火藥修驗銀一萬九十八兩以歲減火伏工費屯船充公等銀充用自是以後時有增減

江甘二縣陸路巡役二十名原設二十四名乾隆五十四年裁減

江都縣巡役三十二名水手十八名巡船九隻原設巡役三十

九名乾隆二十六年裁減又廖家石羊董家三溝看守杜私椿木人

役六名乾隆六年設

甘泉縣巡役四十名水手十二名巡船六隻原設巡役四十八名

水手二十名巡船十隻均又陳家集巡役十四名嘉慶二年設

儀徵縣巡役二十名水手六名巡船三隻又天池江口

健快二名舍人一名皂役一名原設健快五名舍人二名皂役二名乾隆十七

年裁減又巡攔快役六名

高郵州巡役四十名水手二十二名內河巡船八隻外

湖巡船二隻

興化縣巡役二十三名水手十名巡船五隻原設巡役十三名水

手六名巡船三隻乾隆三十三年增

寶應縣巡役三十二名水手十二名巡船六隻原設巡役四十

名乾隆二十六年裁減

泰州巡役四十名水手二十名巡船十隻原設巡役七十五名水手

三十名乾隆廿年三十四年遞減

東臺縣巡役三十二名水手十四名巡船七隻

乾隆三十四年

初設巡役十六名水手八名巡船四隻乾隆四十三年嘉慶三年遞增

重修揚州府志卷之二十一

重修揚州府志卷之二十一

兵志一

形勢阨塞

管子云不知地利者不能行軍孫子曰地形者兵之助
晁錯曰用兵臨戰合刃之急者三一日得地形何承天
曰山陵水泉地陳也蓋地利之於兵如養生者必藉於
飲食遠行者必資於舟車也孫子十三篇大都推明地
利不特九攻九地之文而已章俊卿羣書考索論江南
至於河南鎮守之地曰大抵無江北則守江南京口牛
渚姑熟潯陽夏口江南之鎮守也進而有江北則廣陵
濡須皖城邾池安陸爲鎮守矣又進而有淮南則淮陰

鍾離合淝壽春義陽為鎮守矣又進而有淮北則下邳
 彭城泗口角城譙城垂瓠白狗堆為鎮守矣又進而有
 河南則東陽歷城碭滑臺雍邱滎陽虎牢洛陽為鎮
 守矣是廣陵者江北之重鎮也昔曹氏篡漢據有郡國
 九十一東拒孫吳以廣陵壽春合淝汜口西陽襄陽為
 重鎮孫氏有郡國四十三北拒魏以廣陵濡須牛渚邾
 城皖城汜口武昌為重鎮晉之伐吳也凡六道王渾出
 江西王戎出武昌胡奮出夏口杜預出江陵王濬唐彬
 下巴蜀而首命琅琊王佑出涂中涂與淝通即今滁州達
 儀徵之路苻堅之盛也東取彭城下邳拔淮陰盱眙略
 淮南北其時兵鋒及於三阿即今高郵之三阿鎮也劉
 宋時魏太武南侵拓拔仁自洛陽趨壽陽長孫真趨馬
 頭拓拔那自青州趨下邳太武自東平趨鄒山攻彭城
 不克遂遣魯爽出廣陵拓拔那出山陽拓拔仁出橫江
 太武踰淮而南至瓜步還攻盱眙自是劉宋遂失淮北
 四州徐兗青冀也徐治彭城兗治滑臺青治東陽冀治歷城及豫州治汝南淮西之
 地豫州淮西之地謂汝南新蔡譙梁陳向頓潁川汝陽汝陰諸郡也及至蕭齊永壽中
 壽陽降魏之後進取建安建安今固始縣合淝於是盡失淮南
 然以廣陵諸郡尚存猶堪立國梁太清末高歡將辛術
 南略鍾離壽陽下邳東海淮陰山陽合淝以及義陽諸

州鎮次第降附尋又入廣陵拔陽平今寶應縣地取歷

陽於是北齊地遂南至於江以至陳氏劃江為守隋高

祖時諸臣進平江南之策唯須令武昌以下斬滁吳今廣

陵海等州更帖精兵荆襄梁郢等州遠造舟楫多張形

勢為水戰之具蜀漢二江是其上流彼必以上流有軍

令精兵赴援下流諸將即擇便橫渡如擁眾自衛上流

諸軍即鼓行以前彼雖恃三江五湖之險不能自立矣

開皇初遂以賀若弼為吳州總管鎮廣陵韓擒虎為廬

州總管鎮廬江尋命晉王廣出六合秦王俊出襄陽楊

素出永安又命劉仁恩出江陵王世積出斬春韓擒虎

出廬江賀若弼出廣陵燕榮出東海東西並進既而賀

若弼自廣陵韓擒虎目橫江同時俱濟遂克建康而陳

亡矣唐淮南道治揚州領揚楚滁和壽廬舒蕲黃安沔

十一州其地北控武寧治徐西北控彰義即淮西南控

鎮海治潤西南控江西即江南西道節度使又西控寧

國即宣歙節度而總以揚州為根本故高駉揚行密得

以保境自大李氏因之以成割據周世宗之攻南唐也

先分兵攻略滁揚諸城鎮進克壽州又進克濠泗諸州

凡揚泰滁和海楚泗濠壽光廬舒蕲黃十四州盡為周

有廓地南至於江矣至宋初而李煜入朝宋之既南渡

也李綱言今既以東南爲根本當先料理淮甸荆襄以爲東南屏蔽夫六朝所以保有江左者以強兵巨鎮俱在淮南荆襄故以魏武之雄苻堅之強拓拔宇文之盛卒不能窺江表李氏有淮南則可都金陵及淮南失而國隨滅矣及金主亮之南侵也一自海道徑趨臨安一自蔡州瞰荆襄一自鳳翔趨大散又遣別將趨淮陰楚州亮自率大軍自渦口渡淮兩淮悉陷亮軍和州遣師渡采石虞允文敗之亮乃移軍揚州屯瓜洲將攻京口會其內潰宋乃收兩淮地故能立國南宋之末巴顏旣屯建康令別將攻揚廬斷淮南援兵又分兵諸將略江西湖南地時文天祥請分境內爲四鎮建都統居中以廣西益湖南而建闔於長沙以廣東益江西而建闔於隆興以福建益江東而建闔於鄱陽以淮西益淮東而建闔於揚州責長沙取岳隆興取蘄黃鄱陽取江東謂建康宣也揚州取兩淮地大力足以抗敵約日齊舉有進無退彼備多力分疲於奔命自當引却朝廷不報旣而巴顏發建康分兵三道一軍由建康出廣德四安鎮趨獨松關一軍由鎮江並海入江陰趨溇浦華亭巴顏帥中軍陷常州自平江趣嘉興所至奔潰朝廷大懼而兩淮猶爲朝廷守李庭芝在揚州與眞州苗再成等力戰尤

力文天祥以為淮東堅壁閩廣全城敵人未必智力全備但乘勝長驅耳若一戰以挫其鋒必當引退因命淮師截其後猶可為也陳宜中等不從遂籍地奉表明太祖既取集慶明應天府元集慶路於是東取鎮江廣德常州江陰

以扼吳寇而保太平池州以拒偽漢南取宣歙建德婺衢處信以控閩粵北取揚州泰興以規淮泗及偽漢既滅遂取廬州路又取泰州既而盡取兩淮地以翦吳寇羽翼永樂之南下也既入泗州度淮下盱眙時諸將分屯鳳陽淮安或請先攻鳳陽或欲先取淮安帝曰二城

兵多食足攻之不易不若乘勝鼓行揚州儀真軍弱備

寡可招而下既得真揚淮安鳳陽人心自懈我耀兵江上聚舟渡江京城必有內變遂趨天長入揚州江北諸州多來附又克儀真立營於高資港命將集艦於瓜洲遂濟江歷以前事觀之則知淮南者江左之根本而揚州者又淮南之根本南北攻守之效俱見於前事矣故顧祖禹曰揚州根柢淮東控禦南北自昔為東南都會漢吳王濞稱兵於此天下幾為動搖孫權不得廣陵雖數爭淮南而終以長江為限東晉以後皆建為重鎮梁末沒於高齊烽火照於建業隋人命賀若弼鎮廣陵陳祚不可復保李子通竊取江都亦復南據京口保有數

郡唐時淮南重鎮莫若揚州及高駢擁節自雄猶能外禦巢溫之毒及旤成呂畢楊行密收其餘燼亦能并孫儒却朱溫繕兵積粟保固江淮沿及南唐尙爲強國迨周世宗克揚州江南於是日蹙矣宋室南遷以揚州枕臂江淮倚爲襟要金人至揚州韓世忠一敗之於江中再敗之於大儀劉錡又敗之於瓜洲阜角林於時阻淮爲守自廣陵而抵淮陰爲全淮左臂京口秣陵均資捍蔽趙范曰揚州者國之北門一以統淮一以蔽江一以守運河皆不可無備王應麟曰揚州俯江湄瞰京口南攝鉅海之滸北壓長淮之流必揚州備而後淮東可守真德秀曰淮揚合淝兩淮之根本蓋淮東控扼有六一曰海陵二曰滁口三曰鹽城四曰寶應五曰清口六曰盱眙而皆以揚州爲根本及宋運已移李庭芝竭蹙於此元人且畏其鋒明初旣定金陵卽北收揚州不特唇齒攸寄亦以包并淮南都燕之後轉輸特重揚州爲之咽喉故防維常切中間更歷倭患而揚州益爲扼要之所及至末造偷息江沱猶令大學士史可法出鎮揚州當時策士曾勸其由此徑駐彭城將見大河以南長淮以北必且翕然効命歷觀前事則揚州之形勢重矣茲故取揚州城戍山川阨塞之數著於篇俾覽者可以周

知險易其歷代設兵及

本朝營制胥詳載焉

初廣陵城在今府城東北秦置縣二世二年廣陵人邵平爲陳勝徇廣陵是也漢因之吳王濞都此劉昭曰濞築廣陵城周十四里半後江都國及廣陵國皆治焉後復爲廣陵郡治三國時魏移治淮陰而以故城爲邊邑魏主丕黃初五年伐吳自壽春至廣陵登故城觀兵有渡江之志後地入於吳孫氏建興二年孫峻城廣陵不成晉滅吳廣陵郡仍治淮陰南渡後還治廣陵太和四年桓溫發徐兗二州民築廣陵城遂移鎮焉時兗州寄

治廣陵徐州寄治京口發此二州民以往役也劉宋大明二年竟陵王誕據廣陵叛詔沈慶之攻之拔其外城進克小城誕敗死北齊增置江陽郡與廣陵並治隋初廢開皇十八年改縣曰邗江大業初更名江陽與江都縣並爲郡治唐初江陽縣併入江都貞觀十八年復析置江陽縣於郭下南唐又改爲廣陵縣宋初因之熙寧五年省南渡後復置尋廢城邑考揚州城舊有大城又有子城亦曰牙城周顯德五年克揚州使韓令坤鎮之州故城西據蜀岡北抱雷塘令坤以城大難守卽故城東南隅築小城以治之旣而李重進復改築州城周十

一里宋紹興中郭棣知揚州以爲城故憑高臨下四面險固重進始改卜今城相距二十里勢處卑濶寇易襲瞰請仍卽遺趾建築許之未幾役竣與舊墉南北對峙中通夾道疏兩濠緩急足以轉餉謂之大城後又於大城西南隅改築州城卽今之城周九里有奇明初因之嘉靖三十三年復築新城起舊城東南東北角周十里有奇與舊城相埒於是揚州有新舊二城故邗溝城寰宇記云在州西北蜀岡上左傳哀公九年吳城邗溝通江淮時所築漢已荒圯謂之蕪城胡三省云魏主丕登廣陵故城卽蕪城矣又有廣陵故城在府北十八里志云楊吳時嘗分江都城置此又江都城在府西南四十里志云漢縣治此三國時廢晉太康六年復置江左時廢時置隋唐爲附郭縣今故城已圯於江明一統志云江都縣宋治州城東南隅元徙治北關外至正中毀國初復置於今治輿縣故城在府西四十五里漢縣屬臨淮郡後漢屬廣陵郡晉因之宋元嘉十三年并入江都縣又齊寧城在府東南六十里南齊永明初置縣屬廣陵郡阮昇之記云齊建武五年遏艾陵湖水立裴塘屯立齊寧縣於萬歲林旋廢又圖經云隋末嘗分江陽立本化縣於郡東南二里合瀆渠上旋廢又府北二十五

里有新城晉謝安上書求北征出鎮廣陵之步邱築壘
新城卽此宋德祐二年李庭芝固守揚州元師據兵高
郵寶應以絕其餉道元師又拔新城以逼之亦此地又
張公城在府西四十里志云東漢桓帝時廣陵賊張嬰
所築張綱爲郡守單車造賊壘示以恩信卽此處也又
寶祐城在府北七里志云城周一千七百丈遺隍斷塹
隱隱可尋宋寶祐四年賈似道奉詔所築所謂包平山
而瞰雷塘者時又築新堡城二城相連名曰夾城瓜洲
城在府南四十里江濱江沙漸長狀如瓜字接連楊子
江口民居其上自唐開元以後漸爲南北襟喉上元初
劉展設疑兵於瓜洲而潛自上流襲取潤州明年田神
功等討展亦軍於此唐宋漸有城壘宋建炎二年金人
南侵亦由此以小舟渡江江浙大震至紹興三十一年
金人復南侵劉錡畱屯於此以拒之師退之後史浩議
築城置守張浚謂棄淮守江示弱於敵遂罷乾道四年
始築城堡於此德祐初元兵陷建康遣張宏範屯兵瓜
洲宋軍水陸進攻不能克旣而元人置行省於瓜洲遂
斷淮東援道分軍三道進窺臨安而宋以亾儀徵縣城
在府西南七十五里西南渡江至江寧府六十里西至
天長一百二十里東南渡江至句容縣九十里漢江都

縣唐楊子縣地五代時楊吳爲永貞縣南唐置迎鑾鎮
宋乾德二年升爲建安軍其時始築城大中祥符六年
改眞州政和七年賜郡名曰儀眞元至元中曰眞州路
明爲儀眞縣儀徵縣志載開禧三年州守林伯盛請脩
州城樞密院劄云眞州爲淮南要衝江浙之襟喉鎮江
建康之唇齒北至盱眙淮河二百四十里路逕廣濶並
無山川險阻舊城盡皆傾倒遂至敵騎侵犯今旣修築
須爲經久之計一欲如瓜洲作簸箕城須是四面皆築
城方可拒敵一眞州舊城多白沙不實須是取北山黃
土夾築嘉定五年州守李道傳請築東西翼城其申文
云淮東陸程自滁州取六合自盱眙取天長兩路會於
眞州兩晝夜可到旣到眞州四十里可渡鎮江六十里
可渡建康實爲陸路要衝應請築兩翼城以爲捍衛十
一年州守袁申儒再以州民所陳翼城便宜十二事上
請十二年復請其申文云敵騎之來其路有五一自六
合胥浦橋一自銅山巷一自茅家山一自北山一自焦
家山平原廣濶四通八達難以兵截開禧丙寅庸將徒
以兵截胥浦橋一路敵乃分兵自銅山巷茅家山後擣
我師之背今唯當以水限若焦家山一路有陳公塘水
以流浸其北山塘水可以浸過北山一路及茅家山前

所有茅家山後銅山巷胥浦橋三路則水流有所不及
申儒遂於茅家山兩山相對處因其有三汊一澗橫截
築塘岸九十五丈以爲水櫃可以接北山之水灌浸
斷銅山巷茅家山胥浦橋三路就地面置放水石牯却
於高處置減水石牯牯身并用石板鋪砌塘岸高二丈
脚濶七丈面濶二丈向裡排列椿木橫板以捍波濤之
洗蕩兩役得成則水浸於外翼城衛於內緩急之際可
以憑藉爲守楊子廢縣城在縣東南十五里九域志云
楊子縣東南至揚州六十里渡江而南至金陵亦六十
里隋末杜伏威嘗置戍守於此永淳元年始分江都置
楊子縣至德三載永王璘反令季廣琛趨廣陵攻采訪
使李承式時招討判官李銑在廣陵有兵千餘宦者啖
廷堯邀銑屯楊子是也大厯以後鹽鐵轉運置巡院於
此有畱後官掌之廣明初淮南帥高駢奏改楊子畱後
爲發運使五代末爲永貞縣宋太平興國中復爲楊子
縣大中祥符六年置眞州移楊子爲附郭縣建炎初升
爲軍四年復爲縣紹興中又爲軍未幾復改元仍爲楊
子縣明初省又縣西二十里地多山谿旁有崇邱道出
六合皆昔時戍守處也高郵州城在府東北一百二十
里北至淮安府一百十里西至泗州一百里東南至泰

州一百里春秋時吳地秦屬九江郡漢屬廣陵國後漢屬廣陵郡晉屬臨淮郡宋復屬廣陵郡齊因之梁置廣業郡尋改神農郡隋郡廢屬揚州大業初屬江都郡唐亦屬揚州宋開寶四年置高郵軍熙寧五年軍罷仍屬揚州元祐中復置軍建炎四年升爲承州紹興五年州廢三十六年復爲軍元置高郵路尋改爲高郵府屬揚州路明初改爲州以州治高郵縣省入州界於揚楚間號東西咽喉唐咸通九年桂州戍卒龐勛等叛還徐州道經淮南淮南將李湘言於節度使令狐絢曰高郵岸峻而水深狹若奇兵伏其側焚荻舟塞其前而以勁兵蹙其後可盡擒也絢不從及勛至徐州遂爲東南大患周顯德四年攻楚州遣兵趣揚州至高郵唐人焚廬舍悉驅其民渡江而去元末張士誠據此爲江淮之厲蓋州藪澤環翳易於控扼也臨澤廢縣城在州東北九十里劉宋初置縣屬海陵郡齊梁因之隋初併入高郵又州境有竹塘三歸等縣皆梁置屬廣業郡高齊及周同之至隋亦俱併入高郵寶應縣城在高郵州北一百二十里北至淮安八十里西至盱眙縣百八十里西南至天長縣百七十里漢爲平安縣屬廣陵國後漢改爲安宜縣晉復置陽平郡梁爲陽平郡治兼置東莞郡於此

高齊及周因之隋郡廢縣屬揚州唐武德四年置倉州
七年州廢縣屬楚州上元三年改爲寶應縣宋因之寶
慶三年升爲寶應州尋又升爲軍元至元十六年改置
安宜府二十年府廢爲寶應縣改屬高郵府安宜故城
在縣西南漢縣治此梁置陽平郡寄治山陽安宜縣屬
焉太清二年秦郡陽平皆降於侯景景改陽平爲北滄
州秦郡爲西兗州大寶初東魏將辛術圍陽平不克旣
而術鎮下邳復渡淮攻陽平大掠陳太建五年吳明徹
伐齊克石梁降陽平郡卽安宜也又縣西八十里有石
鼈城二國時魏鄧艾築此以營田者晉永和中荀羨鎮

淮陰屯田於石鼈北齊乾明初蘇珍芝議修石鼈等屯
歲收數十萬石自是淮南軍防足食後周置石鼈縣隋
初廢入安宜又縣東南十五里有金井城相傳宋時築
又縣西八十里有高黎二城相傳亦宋治平中築又有
韓王城在縣東南四十里射陽湖陰相傳宋紹興中韓
世忠鎮淮陰時築興化縣城在高郵州東百二十里南
至泰州百二十里北至鹽城縣百十里唐海陵縣之昭
陽鎮楊吳始置興化縣屬江都府南唐屬泰州宋建炎
四年改屬承州紹興五年改爲鎮屬海陵縣十九年復
爲縣仍屬泰州乾道中屬高郵軍泰州城在府東北百

二十里東至海二百四十里東南至通州二百九十四里西至高郵百五十里南渡江至常州二百五十里春秋時吳地戰國時屬楚秦屬九江郡漢屬臨淮郡東晉安帝分廣陵立海陵郡宋以後因之隋初郡廢仍屬揚州唐武德四年因周舊置吳州七年廢還屬揚州楊吳乾貞中爲海陵制置院南唐昇元中改置泰州宋因之元置泰州路後改爲州屬揚州路明初仍爲州州面江枕淮川原沃衍魚鹽繁殖稱爲輿區若夫風帆便利跨越吳會聯絡青齊則海舟之利也今州治漢置縣屬臨淮郡後漢省晉太康初復置海陵縣屬廣陵郡東晉末始置海陵郡宋齊時海陵縣皆屬廣陵郡而海陵治建陽縣梁時始爲郡治隋復廢郡唐初置吳州改爲吳陵縣州尋廢縣仍曰海陵南唐以後爲泰州治明初省建陽廢縣在州東北七十里本東海郡屬縣晉義熙中僑置於此屬山陽郡尋屬海陵郡宋齊時爲郡治梁仍屬海陵郡隋省尋析置江浦縣於此大業初復省入海陵縣或曰秦漢時東陽廢縣在州東百里其東有長洲澤又東有扶海州今湮又州北五十里有新城宋端平中州守許堪別築堡城於湖蕩沮洳中周二百丈德祐二年元阿珠遣兵拔新城畱兵以逼泰州元末張士誠入

泰州壞其城乃修築新城設義兵元帥府及州治於此
既而士誠將夏思恭等葺舊州城據守之明初徐達兵
至泰興水道不通乃自大江口挑河十五里直抵州之
南門灣思恭等退保新城達因築海安城以絕通州之
援遂克之城今圯又海安城在州東百二十里明初徐
達攻江北進圖泰州使孫興祖留鎮於此以斷賊援軍
蓋控扼要地也今爲海安鎮有土城周六里海防考云
鎮居如臯泰州之中東可以控禦狼山通州海門之入
西可以捍衛揚州東臺縣在泰州東北向爲東臺水利同知治所乾
隆三十三年析泰州置縣治踞范公隄東抵大海西接

興化北連鹽城西南則泰州東南則如臯泰州遮蔽江
海爲郡城之障東臺則又泰州之障也揆其形勢大海
浸於東自廖角嘴北及青沙南則大江北則大河中間
數百千里其南如長沙港苴河港黃沙洋其北如王家
港鬪龍港野潮洋及射陽湖口雖不盡縣屬皆通海水
道縣實總遏其衝此揚州闔郡城戍之大較也至揚州
本係江海澤國其藉州澤以爲阻固者府南大江歷通
州海門而入海江心與鎮江府分界魏黃初五年不至
廣陵時江水盛漲臨望嘆曰魏雖有武騎千羣無所用
之未可圖也明年復入廣陵故城臨江觀兵見江濤洶

湧歎曰此天所以限南北也其後南北津濟廣陵京口
實爲襟要劉裕平南燕以盧循犯建康疾馳至廣陵濟
江趣京口陳霸先旣平侯景卽自京口濟江圍齊廣陵
隋平陳賀若弼自廣陵濟江拔京口唐宋以來濱江洲
渚日增江流日狹初自廣陵楊子鎮濟江面濶相距四
十餘里唐時伊婁埭江濶猶二十餘里宋時瓜洲渡口
猶十八里今瓜洲渡至京口不過七八里渡口與金山寺相對自
瓜洲而東十八里爲沙河港其東南與焦山寺相對亦
謂之沙壩河舊與白塔芒稻二河俱爲泄水通江處又
東五里曰深港俱東面設防處也又東五十餘里曰寶
塔灣爲鹽盜淵藪其南岸汊港可進圖山又東南四十
五里曰三江口亦曰新港又東至周家橋四十里正與
江南圖山相對中有順江洲江面稍狹水流最急此處
扼守則可以障蔽瓜儀江心要會有一字港上接圖山
十里下接三江口十里官兵可以駐劄寇由通州狼山
以西每於此泊守若一入新港登岸稍西則揚州矣此
新港爲可以登岸可以入海之要口江防最切要處也
舊圖經謂楊子江自黃天蕩西牛步沙與建康爲界由
瓜步下小帆船經儀徵縣境內東下至鐵釘港鷺翎醮
與鎮江分界東北趣江都逕通州入海所謂楊子江也

江防考大江南岸鬪山北岸三江口爲第一重門戶鎮
江瓜洲爲第二重門戶儀徵天寧洲爲第三重門戶而
儀徵縣江面自縣東行五十里至瓜洲以達鎮江西行
亦五十里自瓜埠以達江寧今縣南有上江下江舊江
三口上江口去下江口一里下江口與天寧洲相對其
東十五里爲舊江口有舊江口巡司西北至縣十里與
江心新洲相對皆爲沿江戍守處也江防考縣南十里
爲天灣洲近大江南岸元末康茂才結砦處也縣東南
五里爲新洲與天寧洲相映帶洲渚紆回蟻港環錯並
爲江洋要害縣東南四十里曰高資港亦近江南岸有
巡司西至天寧洲三十里明建文四年靖難兵克儀真
營於高資港是也又有何家港在縣東二十里爲北岸
要口東至江都花園港十五里西至舊江口十里由京
口渡此登岸則東走瓜洲西入儀徵皆爲徑易故防守
尤切此揚州大江之形勢也運河卽古邗溝春秋時吳
通江淮之處三國時吳嘉禾三年分道伐魏遣將軍孫
韶等入淮向廣陵淮陽又太平二年孫峻使文欽等自
江都入淮泗皆使之自邗溝以入淮也伊婁河在府南
二十里楊子鎮南通大江自隋以前楊子鎮臨江逕渡
京口唐時積沙二十餘里渡江者繞瓜洲沙尾紆行六

十里開元二十六年齊澣爲潤州刺史請於京口埭下直趨渡江二十里開伊婁河於揚州南至德中永王璘作亂據丹陽淮南採訪使李承式遣裴戎以廣陵卒三千戍伊婁埭宋紹興三十一年金亮軍瓜洲楊存中命戰士踏車船自京口薄瓜洲迨岸復回金兵皆持滿以待其船中流上下回轉如飛敵相顧駭愕卽此處也又茱萸灣在府北十五里阮昇之記云吳王濞開邗溝道軍至海陵倉以地有茱萸村故名今從官河分流東經茱萸灣行五十里至宜陵又東六十里至泰州元和志隋仁壽四年開此以通漕一名灣口一名灣頭一名東

塘唐中和初黃巢入長安淮南帥高駢聲言入討出屯東塘中和三年畢師鐸囚高駢爲楊行密所敗行密攻其四門師鐸出奔東塘行密遂入揚州而不能守會秦宗權遣弟宗衡掠地淮南師鐸還自東塘行密閉城不敢出已而去揚州及再入揚州馮宏鐸叛襲宣州與田頽戰於曷山宏鐸敗將入於海行密自東塘邀之以宏鐸歸又田頽與潤州安仁義叛仁義悉焚東塘戰艦蓋東塘卽今灣頭至宜陵一帶塘岸對江卽潤州界淮南戰艦聚於東塘故仁義得而焚之也周顯德三年韓令坤克唐揚州而守之唐兵反攻令坤敗之於灣頭宋紹

興四年詔毀灣頭港口牐以遏金兵令不得積水通船
紹定三年李全以楚州叛攻揚州至灣頭據運河之衝
德祐二年元兵攻揚州屯灣頭及楊子橋瓜洲諸處真
州守苗再成欲以通泰兵收灣頭是也艾陵湖在府東
北四十五里邵伯湖之東謝安立邵伯堰卽堰此湖之
水齊建武五年遏艾陵湖水於此立裘塘屯府城西南
十九里有三里溝宋德祐初元兵自真州乘勝趣揚州
州將姜才敗之於三里溝元兵佯退才逐之元兵還戰
至楊子橋兩軍夾水而陣元兵絕水進戰才兵潰元兵
進薄揚州南門志云今城南三里亦曰三里溝南接馬

泊港港在府西十五里又南通徐港達大江儀徵縣白
沙鎮在縣城南濱江卽白沙洲也舊爲戍守要地齊建
武初魏人入寇詔於白沙置一軍長蘆分置三軍唐至
德二年永王璘作亂其將馮季康奔白沙降於淮南採
訪使李承式上元元年劉展據廣陵軍於白沙濟江襲
下蜀遂取潤州後唐同光二年徐溫改白沙爲迎鑾鎮
周顯德五年世宗如迎鑾鎮屢至江口破南唐水軍宋
建隆初太祖征李重進於揚州習戰艦於迎鑾鎮李景
大懼乾德二年始置建安軍於此長蘆河在縣西四十
里其上流爲沙河自江浦六合流入界齊建武中詔於

白沙分置一軍長蘆分置三軍卽此處也宋天聖中發
運使張綸請開長蘆口河入江以避大江風濤之險建
炎三年金人陷太平長驅至建康守臣杜充渡江遁真
州諸將怨充嚴刻謀害充充至不敢入營居長蘆寺遂
降金亦卽此處也又縣東南有地名老鶴嘴宋德祐初
元將阿珠攻真州州守苗再成敗績於此阿珠遂乘勝
趨揚州蓋卽縣東南之老鶴夾也又青山嘴在縣西二
十里江防考青山嘴西至東溝二十里東至下江口三
十里與老鶴夾俱爲沿江扼要處胥浦橋在縣西北七
里志云胥浦之水源出小銅山東南流至城西復折而
西南流里許爲上江口入江俗謂之鑰匙河是也宋紹
興三十一年邵宏淵退保於此以拒金亮之師又端平
三年蒙古將察罕攻真州州守邱岳敗之乘勝復戰於
胥浦橋仍設伏城西敵至伏起殺其騎將元兵引却高
郵州西北五十里上流爲樊梁溪自天長縣石梁河流
入州界瀦而爲湖與新開巒社爲高郵三湖繫年錄云
承楚之間有樊梁等三湖綿亘三百餘里宋紹興初有
張榮者聚眾於此擊敗金人金人陷揚州榮駐鼉潭湖
積芟爲城以自固今鼉潭湖在州東北九十里巒社湖
在州西北二十里東西長七十里南北濶五十里元至

正十三年張士誠作亂淮南行省李齊出守甓社湖是也白馬塘在州西南七十里北近三阿鎮晉太元中苻堅將彭超句難等侵圍幽州刺史田洛於三阿謝幼度自廣陵西討解田洛圍進據白馬卽此處也又唐李孝逸破徐敬業處寶應縣城南六十里有津湖東通運河西北接汜光湖南入高郵州界卽精湖也魏黃初六年魏主自廣陵還至精湖時十月水涸戰船數千皆滯不得行魏主畱船蔣濟濟鑿地聚船作土豚遏湖水灌之入淮卽此處也白水塘在縣西八十五里濶三十里周二百五十里北接山陽西南接泗州盱眙縣界亦曰白水陵三國時魏鄧艾所作與盱眙破釜塘相連宋元嘉末嘗決此塘以灌魏軍隋大業末破釜塘壞水北入淮於是白水塘亦涸興化縣東十里有得勝湖本名縮頭湖宋建炎中張榮等率山東義軍由梁山灤與金人轉戰至承楚間金兵在泰州榮以舟師設伏掩擊於縮頭湖大敗其眾因更名得勝湖東臺縣東南二百八十里

有壺豆洲梁侯景敗走自滬瀆下海欲向蒙山羊鯤以舟師直下京口至壺豆洲誅景卽此地也至闔郡陸路扼塞之處則蜀岡在府城西北四里綿亘四十餘里西接儀徵六合縣界東北抵茱萸灣隔江與金陵相對自

邵伯埭以南地勢皆高仰岡阜連亘幾數百里淮之不能合於江也勢也揚州城在蜀岡東南城之東南北皆平地溝澮交貫唯蜀岡西接廬滁凡北兵南侵揚州率循山而南據高爲壘以臨之唐光啟三年楊行密以畢師鐸之亂自廬州援廣陵軍於揚子並西山以逼廣陵所謂西山卽蜀岡也旣而行密克揚州蔡賊秦宗權遣其弟宗衡等與行密爭揚州抵城西據廣陵故寨卽行密舊屯處周顯德三年克揚州南唐將陸孟俊自泰州進攻揚州屯於蜀岡周將韓令坤懼而出會救至乃復入城蓋據蜀岡則斷周兵糧援之路令坤所以懼而走也大儀鎮在城西七十里接天長縣界宋建隆元年太祖征淮南李重進次大儀遂克揚州紹興四年劉豫以金人入寇步兵自楚攻承州騎兵自和攻滁州韓世忠軍揚州分兵守承州親提援兵至大儀以當敵騎伐木爲柵自斷歸路勒五陣設伏二十餘所金前軍趣江口距大儀五里別將擁鐵騎過五陣東伏發寇大敗去論者謂大儀之捷中興武功第一者也宜陵鎮在府東北六十五里地勢高阜民居稠密自灣頭達泰州之道也又萬壽鎮在府東四十里西至寶塔灣五里有巡司戍守自萬壽鎮而東三十里爲歸仁巡司司之西卽三江

口司之東爲廟灣與周家橋逼近皆濱海設防處也阜
角林在府南三十里宋紹興三十一年金亮南侵劉錡
軍瓜洲遣將拒金人於此設伏林中敵至伏發金人大
敗旣而金人以運河岸狹非用兵之利遂引去復進敗
之白土戍在府西宋大明三年竟陵王誕舉兵廣陵詔
沈慶之討之慮誕奔魏使慶之斷其走路慶之營白土
去城十八里又進軍新亭逼之新亭蓋在蜀岡上又達
八店亦在城西宋淳祐初元人人滁和諸州淮東將鄧
滄等戰於揚州之達八店却之又桑里在府城西南二
十里宋大明三年沈慶之攻廣陵宋主命爲烽於桑里

克外城舉一烽克內城舉二烽禽劉誕舉三烽是也儀
徵縣東北十里有地名歐陽水經注所謂邗溝水上承
歐陽引江入埭六十里至廣陵城宋大明三年竟陵王
誕舉兵廣陵詔沈慶之討之慶之進至歐陽齊延興元
年蕭鸞使王廣之襲南兖州刺史安陸王子敬廣之至
歐陽遣部將陳伯之先驅入廣陵梁太清二年侯景圍
臺城北徐州刺史蕭正表叛附侯景景以爲南兖州刺
史正表乃於歐陽立柵以斷援軍蕭會理時鎮廣陵遣
兵襲破之正表走還鍾離承聖初王僧辯等破侯景分
遣陳霸先將兵向廣陵時景將郭元建以廣陵降齊霸

先至歐陽齊已據廣陵霸先遂屯歐陽會齊兵圍六合
霸先自歐陽赴救大破之於士林皆此地也高郵州西
八十里有三阿鎮東晉嘗僑置幽州於此太元四年苻
秦將句難彭超圍幽州刺史田洛於三阿去廣陵百里
朝廷大震謝幼度自廣陵馳救難超戰敗走盱眙又三
朶鎮在州東四十里宋建炎中金人攻楚州詔通泰鎮
撫使岳飛援之飛屯軍三朶鎮爲楚州聲援既至三戰
三捷今其地有三朶橋跨山陽河河北接射陽湖南至
泰州樊汭鎮接江都縣界又河口鎮在州東八十里接
興化縣舊志云州北三十五里有張家溝巡司州東北
百二十里有時堡巡司嵇莊在州東南十五里城子河
繞其旁宋末嵇聳保聚於此鄉里義而歸之相率不肯
附元處也寶應縣南二十五里有陵亭鎮唐天順朱全
忠將龐師古略淮南下天長高郵引兵深入與孫儒戰
敗於陵亭乃還又瓠子角在縣東南明初徐達等攻興
化太祖曰瓠子角興化要害地所必經達奉命以兵扼
其地興化遂下也此皆揚州水陸地勢有關於兵事者
其餘城鎮山川俱各著專篇不復具述

兵志二

歷代設兵

漢法置車騎材官樓船於郡國王國則中尉郡則都尉掌之揚州在漢多爲王國其設兵猶是也後漢建武六年罷都尉并職太守七年又罷車騎材官樓船然應劭云有劇賊則都尉臨時復置故廣陵賊張嬰聚眾數千人據廣陵朝廷拜滕撫爲九江都尉與馮緄合州郡兵數萬人共討之蓋當時九江亦復有賊故令撫以九江都尉兼治廣陵撫旣斬九江賊范容陰陵賊馬勉等遂拜中郎將督揚徐二州事進擊張嬰斬獲數千人以此

事觀之建武初雖去郡國兵而刺史所將州兵及郡國更卒如故且郡國有事亦得募奔命兵故史稱撫合州郡兵數萬討之至史稱撫之以中郎將督揚徐二州事卽魏晉以降都督數州軍州事之所由昉東漢廣陵屬徐州是時撫殆以中郎將督揚徐二州事鎮廣陵也於此可以見後漢時揚州兵制之略魏刺史亦典兵如漢廣陵時屬徐州徐州治彭城而廣陵亦爲重鎮然是時廣陵治淮陰故城空之以爲邊竟蓋未能有其地也吳於江北廣陵之地置監軍使者孫亮傳云五鳳二年使衛尉馮朝城廣陵拜爲監軍使者督徐州諸軍事是也西晉諸州刺史初亦領兵旣平吳乃詔州郡悉去兵大郡置武吏百人小郡五十人後以盜賊羣起乃以都督並任刺史其名有大將軍都督四鎮四征四平之號其諸州刺史任重者爲都督輕者爲督或帶四中郎將凡所治之地皆置州兵揚州刺史治建康然孝武時謝安以揚州刺史加大都督鎮廣陵之步邱徐州刺史初鎮廣陵其見於史者康寧初刁彛王坦之太元中謝幼度兗州刺史初治京口後移鎮廣陵其見於史者太寧三年郗鑒又孝武時王坦之謝幼度又青州刺史始終俱鎮廣陵元帝時僑置以廣陵控扼三齊故青兗同鎮幽

重刊易州府志 卷之二十三
州刺史亦治廣陵之三阿當時蓋以廣陵爲江左上游
稱重鎮故諸州刺史多鎮於此其兵亦最勁悍故史稱
太元二年謝幼度爲兗州刺史監江北諸軍事募勇敢
之士得彭城劉牢之等數十人以牢之爲參軍領精銳
爲前鋒戰無不捷號北府兵幼度嘗以五千衆敗秦師
十萬於淝水之上宋刺史亦加都督領兵兗州分南北
南兗州鎮廣陵元嘉中伐魏發緣淮三郡兵集盱眙緣
江五郡兵集廣陵而江南白丁輕進易退故魏主得以
臨江屯瓜步攻盱眙及東陽歷城陷彭城而長淮盡爲
北境齊諸州亦加都督領兵南兗州亦鎮廣陵梁諸州
兵制亦如齊南兗州亦鎮廣陵時屢與魏交戰於淮之
之南北克宿遷合肥翟邱朐山彭城壽春等郡南朝之
境幾復然旋得旋失及侯景平後江以北又悉入於北
齊陳初已失淮但以江爲境大建中伐齊屢捷淮南之
地盡復後復敗於周而江北之地又盡沒北齊略梁地
南際於江其刺史仍爲都督總當州士馬置東廣州鎮
廣陵又有三等鎮置鎮將其在揚州者有海西鎮將北
周改都督諸州軍事爲總管其授總管刺史則加使持
節持節假節以督軍戎置吳州鎮廣陵隋州置總管者
列上中下三等總管刺史加使持節吳州總管鎮江都

揚州大總管亦鎮江都史稱開皇十二年以楊異爲吳州總管二十年以宇文弼爲吳州總管又開皇九年以晉王廣爲揚州大總管鎮江都時楊異出除吳州總管詔令異每歲一與王相見唐武德初因西魏周隋之制置府兵初名統軍別將貞觀十年更號統軍爲折衝都尉別將爲果毅都尉諸府總名折衝府分天下十道置府六百二十四淮南道置府凡六其在揚州境內者有四曰邗江曰方山在今儀徵縣曰新林在今泰州曰江平在今通州所屬之泰興縣王應麟玉海云唐時揚州有府四自江平至邗江凡府三等兵千二百人爲上千人爲中八百人爲下府

置折衝都尉一人左右果毅都尉各一人長史兵曹別將校尉畢具士以三百人爲團團有校尉五十人爲隊隊有正十人爲火火有長火備六馱馬凡火具烏布幕鐵馬孟布槽鍤鑿確筐斧鉗鋸皆一甲牀二鎌三隊具火鑽一冒馬繩二首羈足絆皆三人具弓一矢三十胡祿橫刀礪石大觿瓊帽瓊裝行滕皆一麥飯九斗米飯九斗米二斗皆自備其介冑戎具藏於庫有所征行則視其出入而給之其番上宿衛者唯給弓矢橫刀而已凡民年二十爲兵六十而免其能騎而射者爲越騎其餘爲步兵武騎排攢手步射每歲季冬折衝都尉率

五校兵馬之在府者校閱之因縱獵凡發府兵皆下符契於州刺史與折衝勘契乃發若全府發則折衝都尉以下皆行不盡則果毅行少則別將行又唐初兵戍大曰軍小曰守捉曰城曰鎮而總之者曰道軍城鎮守捉皆有使而道有大將一人曰大總管後改總管曰都督大都督其都督之在江淮間者揚州大都督府鎮江都其有諸王遙領則長史行事如李襲譽之爲揚州長史是也至德元載始置淮南節度使鎮揚州領揚楚滁和壽廬舒光蘄新安黃申沔十三州後所領州如光沔蘄黃等改隸無常至杜佑鎮揚州時史稱其斥海濱棄地爲田積粟五十萬斛列營三十區士馬整飭四鄰畏之自是揚州軍府殷實有一揚二益之號及至高駢蘓亂所在置將攻守其時高郵有鎮遏使光啓三年張神劍爲之五代時江淮之地歸版籍者僅四五州多設重鎮周顯德三年以向訓爲淮南節度使鎮廣陵及南唐時又以荆罕儒爲泰州團練使治海陵周世宗旣克揚州淮南節度使鎮揚州如故恭帝時以李重進任之宋祖受命加重進中書令詔移鎮青州以韓令坤代之重進不自安遂治城隍繕兵甲補軍校拒命宋祖遣石守信等率禁旅以討車駕自大儀逕至城下卽日拔之宋初

革五季之患召諸鎮節度使會於京師賜第以留之分
命朝臣出守列郡號權知軍州事軍謂兵州謂民兵民
之事皆總焉揚州境內揚州知軍州事一人真州知軍
州事一人泰州知軍州事一人高郵置軍時則有知軍
事一人及高郵改軍爲州後又改承州時則有知軍州
一人按宋史沿邊州或當一道衝要并兼兵馬鈐轄或
帶安撫使其餘州軍則別其地望之高下與職務之繁
簡而置之通判與守臣通簽書兵民事其縣令若京朝
官幕職官則爲知縣事有戍兵則兼兵馬都監宣教郎
以下則爲監押是宋初州縣別無軍官知軍州事知縣
事卽軍官也自南渡以後領兵官增置無恒其統轄揚
州者如大都督以見任宰相爲之次則都督同都督又
有督視軍馬亦多以執政爲之雖名稱略同然皆總掌
軍事督護諸將紹興二年呂頤浩首以左僕射出都督
江淮兩浙荆湖諸軍事置司鎮江其後趙鼎張浚湯思
退皆以宰相兼之頤浩還朝孟庠始以參知政事爲權
同都督代之後落權字張浚被旨江上視師置都督行
府行移文字並依三省體式三十一年葉義問以知樞
密院事督江淮荆襄軍馬又制置使中興以後掌本路
諸州軍馬屯防捍禦多以安撫大使兼之亦以統兵官

地重秩高者加制置大使位宣撫副使上或置副使以
貳之建炎初詔令發運監司州軍官並聽制置司節制
開禧中江淮與四川并置大使宣撫使掌宣布威靈撫
綏邊境及統護將帥督視軍旅之事以二府大臣充紹
興元年詔以淮南守臣多闕百姓未能復業分命呂頤
浩朱勝非劉光世以安撫大使兼宣撫使三十二年張
浚以少傅依前觀文殿大學士充江淮東西路宣撫使
乾道五年王炎亦以從官出宣撫江淮等處又有淮東
總領淮西總領各一人與湖廣四川爲四職司餉饋與
間軍政其序位在轉運副使上其江上諸軍淮東總領
掌之又建炎初李綱請於沿江沿淮沿河并置帥府以
文臣爲安撫使帶馬步軍都總管武臣一員爲之副許
便宜行事辟置僚屬將佐措置調發其後沿江有三大
使司淳熙二年詔揚州與廬州荆南襄陽金州興元興
州分爲七路每路委文臣一人充安撫使以治民武臣
一人充都總管以治兵又鎮撫使舊日所無渡江後假
權宜以收羣盜建炎四年范宗尹爲參知政事議羣盜
併力以拒官軍莫若析地以處之盜有所歸則可漸制
乃請稍復藩鎮之制時劇盜郭仲威在揚州薛慶在高
郵皆卽以爲鎮撫使其餘或以處歸朝之人分畫不一

許以能扞禦外寇顯立大功特與世襲其總管鈐轄司
掌治軍旅屯戍營防守禦之政令凡將兵訓練教閱賞
罰之事皆掌之守臣帶提舉兵馬巡檢都監及提轄兵
甲者掌統治軍旅訓練教閱以督捕盜賊而肅清治境
凡諸營兵籍賞罰之事皆掌之大觀三年詔東南帥府
總管依三路都總管法靖康元年詔四道副總管並通
差文武臣其諸路將官掌統所隸禁旅以行陣隊伍金
鼓旗幟弓矢擊刺之法而教習訓練之別其武藝強者
待次遷補以激厲士卒副將爲之貳路分都監掌本路
禁旅屯戍訓練之政以肅清所部州府以下都監皆掌
其本城屯駐兵甲訓練差使之事資淺者爲監紹聖三
年詔諸路將副序位在路分都監之下大觀三年詔帥
府無路分鈐轄望都無路分都監者許置一員建炎初
分置帥府以諸路帥臣兼要郡守臣帶兵馬鈐轄次要
郡帶兵馬都監並以武臣爲之副稱副總管副鈐轄副
都監許以便宜行兵馬事遇起兵副總管爲帥副鈐轄
都監各以兵從聽其節制紹興三年詔要郡次要郡守
臣罷帶兵職及逐路副總管依舊格改充路分都監爲
一路掌兵之官其各州鈐轄或省或置不一又有逐路
兵馬都監兵馬監押掌烟火公事捉捕盜賊又諸軍都

統制副都統制統制統領舊制出師征討諸將不相統
一則拔一人爲都統制以總之未爲官稱也建炎初置
御營司擢王淵爲都統制名官自此始紹興十一年三
大將兵罷諸軍皆冠以御前二字擢其偏裨爲御前統
領官且令仍舊駐劄以屯駐州名冠軍額之上其後皆
除都統制恩敘略視三衙權任在帥臣右王應麟玉海
載都統駐劄之地在高郵者名武鋒軍後又有統制同
統制副統制統領同統領副統領其下有正將準備將
訓練官部將隊將等名皆偏裨也又巡檢司初置於沿
邊溪峒掌治甲兵巡邏州縣擒捕盜賊後沿江沿河沿
淮沿海皆置捉賊巡檢及巡捉私鹽等各視其名以修
舉職業中興以後分置都巡檢巡檢州縣巡檢掌土軍
禁軍招填教習之政令以防奸禦盜凡沿江沿海招集
水軍控扼要害地分濶遠處皆置巡檢一員往來接連
合相應援處則置都監巡檢以總之聽所在州縣守令
節制以上諸軍職於揚州雖史無明文然南渡後揚州
實爲勢形之地控禦所關其建設大略可知況宋史地
理志稱淮南東路揚州大都督府領兵馬鈐轄楚泗承
郵今高州漣水軍鎮撫使駐山陽通泰鎮撫使鎮海陵其
約略可見者也至于宋之兵制大概有三天子之衛兵

以守京師備征伐曰禁軍諸州之鎮兵以分給役使曰
廂軍選於戶籍或應募使之團結訓練以爲所在防守
則曰鄉兵禁軍殿前侍衛二司總之其最親近扈從者
號諸班直其次總於御前忠佐軍頭司皇城司驍驍院
皆以守京師備征伐其在外者非屯駐屯泊則就糧軍
也今按宋史兵志先舉禁軍之駐揚州者言之康定初
趙元昊反西邊用兵京師所遣戍者大率不能辛苦故
議者欲益募土兵爲就糧皆爲禁軍增內外馬步凡數
百營其時江淮及京東西河北河東荆湖兩浙福建各
募宣毅軍大州一營小州一營皇祐五年江淮荆湖置
教閱忠節軍州各一營大州五百人小州三百人嘉祐
四年議者謂東南雖無事不宜弛備乃詔揚州及荆南
江寧府廬洪潭福各募就糧軍號威果軍各營於本州
又益遣禁軍駐泊長吏兼本路兵馬鈐轄選武臣爲都
監專主訓練於是東南稍有備矣忠節軍者其額本隸
侍衛司太平興國二年選諸州廂軍之強壯者立涪化
四年又選川陝威掉克寧兵立爲川忠節舊指揮廿四
後皇祐五年增教閱忠節總爲十指揮在揚州境者共
三指揮揚州一真州一泰州一熙寧以後制同宣毅軍
亦隸侍衛司慶厯中京東京西河北河東淮南江南兩

浙荆湖福建九路募健勇或選廂軍爲之總爲二百八十八指揮至治平中一百七十四指揮在揚州境內者五指揮揚州二真州一泰州一高郵軍一熙寧三年揚州減爲一指揮真州泰州各一如故高郵軍一指揮闕弗補熙寧三年京東增置武威軍分隸河北四路後又以三千人戍揚州及杭州江寧府皆團結軍士置將分領謂之將兵將兵者熙寧之更制也先是太祖懲藩鎮之弊分遣禁旅戍守邊城立更戍法使往來道路以習勤議者以爲徒使兵不知將將不知兵緩急恐不足恃神宗乃部分諸路將兵總隸禁旅使兵知其將將練其士當時開封府界京東西河北路凡卅七將鄜延環慶等路凡四十二將四年又詔團練東南路諸軍亦如京畿之法共十三將自淮南始淮南東路爲第一西路爲第二浙西東路爲第三四江南東西路爲第五六荆湖北路爲第七荆湖南潭州爲第八全邵永應援廣西爲第九福建路爲第十廣南東路爲第十一廣南西路桂州爲第十二邕州爲第十三總天下爲九十二將云又建炎以後諸屯駐大軍武鋒精銳敢勇鎮淮彊勇雄勝武定駐江都雄勝安淮青平小雄邊駐泰州建炎中置沿江水軍又紹興元年置沿海水軍二千人乾道元年

置兩淮水軍二千人以諸州斷配海賊刺隸以上諸軍
宋史兵志俱比於禁軍之列大抵禁軍每軍有都指揮
使都虞候每指揮有指揮使副指揮使每都有軍使副
兵馬使都頭副都頭十將將虞候承局押官等其廂軍
建隆以來之制有揀中騎射軍在揚州境內者共三指
揮揚州一指揮眞州一指揮高郵軍一指揮有奉化軍
在揚州境內者共四指揮揚州一指揮泰州一指揮眞
州一指揮高郵軍一指揮水軍在揚州境內者共三指
揮揚州一指揮泰州一指揮高郵軍一指揮壯武軍在
揚州境內者共三指揮揚州一指揮泰州一指揮高郵
軍一指揮靜勝軍在揚州者一指揮廣濟軍在揚州境
內者共二指揮揚州一指揮高郵軍一指揮裝發軍在
眞州者一指揮車軍在眞州者一指揮鹽車軍在揚州
境內者共二指揮泰州一指揮眞州一指揮眞州又有
新招梢工一指揮泰州又有捍海軍一指揮熙寧以後
泰州又有水運一指揮眞州有梢工都一指揮揚州有
開遠軍一指揮水軍又增眞州一指揮泰州又有耀武
軍一指揮泰州又有水軍奉化一指揮其餘並同建隆
以來之制其諸軍將校則有馬步軍都指揮使有副都
指揮使都虞候馬軍都指揮使副都指揮使虞候步軍

亦如之每都有軍使副兵馬使都頭副都頭十將將虞
候承局押官等又文獻通考載皇祐中京東安撫使富
弼上言頃臣因河北水災農民流入京東者三十餘萬
臣旣憫其瀕死又防其爲盜遂募伉健者以爲廂兵旣
而選尤壯者得九指揮教以武技已類禁軍止用廂軍
俸廩而得禁軍之用可使効死戰鬥而無驕橫難制之
患此當世之大利也詔以騎兵爲教閱騎射威邊步兵
爲教閱壯武威勇分置揚州及青萊淄徐沂密淮七軍
州征役同禁軍又通考載淮南路騎軍之額自威邊以
下六步軍之額自左衛以下二十七並改號曰寧淮凡
爲一百一指揮總四萬一千二百八十五人其鄉兵之
在淮南者則有鎮淮軍初淮南募邊民號鎮淮軍數至
十萬月給視効勇軍唯不黥涅久之廩不足肆劫掠嘉
定初選八千餘人以充効勇餘補鎮江大軍淮西選二
萬六千人充御前定武軍分爲六軍軍設統制又淮南
萬弩營王應麟玉海云始于紹興季年乾道五年復置
名曰神勁軍命御前後軍統領教閱置寨於儀真募萬
弩手以本軍忠勇使効爲名淮東之籍千四百淮西之
籍千六百六年二月真州置神勁營寨收萬弩手一千
五百九十七人紹興末孝宗命張浚置御前萬弩營於

建康戍泗州與敵戰皆有功後散歸其家乾道中令徐子寅復置於真州王圻續文獻通考載嘉定間趙范知揚州務修軍政籍民爲半年兵春夏在田秋冬教閱官免建砦而私不廢農又載孝宗隆興元年臣僚言乞行下都督府專委兩淮守臣各括責山水寨首領姓名保明來上量補官資專一哀集鄉兵俾之團結明立賞格一有緩急入城守禦荆襄邊郡亦乞行制置司措置依此施行詔江淮都督府湖北京西制置司措置二年十一月勅楚滁濠廬光州等路光化軍管內并楊成西和襄陽德安府信陽高郵軍應州縣山水寨首領自備錢糧糾集把隘或戰鬥立功仰逐州軍守臣保明申省取旨推恩又載理宗淳祐四年七月詔江淮失業強壯之人置武勝軍五千人此宋時揚州禁廂民兵見於史籍之大較也唯按顧炎武郡國利病書載揚州宋時兵制云宋制樞密院所統凡有四隸侍衛者爲班直在邊防者爲屯駐隸諸司者爲役兵隸諸州者爲鄉兵崔與之節度淮南選廂軍有材藝者充親軍額親軍卽班直也揚之禁軍有四曰効忠軍威果軍忠節軍武鋒軍廂軍有三曰寧淮軍裝發軍牢城軍各軍俱有指揮統率之其屯駐曰強勇軍以流亡盜賊充役武鋒軍以他州軍

調發敢勇軍以敢勇茶客充隸雄勝軍遷駐寶祐城者
武定軍嘉熙間移駐揚州者游擊水軍御筆立額屯駐
揚州者神武軍乃湯東野出戍揚州者護聖馬軍錢端
禮出戍揚州者雄邊軍趙范以雄邊民兵招充者其他
又有水軍忠節軍保勝軍忠勇軍寧淮軍並隸屯駐大
軍各有統制官以領其屬其後又有淮東司江淮司馬
軍司左軍殿前司左軍步軍司郭振步軍司選鋒司神
武庫軍俱看守城堡者其鄉兵有制勝全軍民船部南
船部水軍澳可水軍俱於諸州募充總戍揚州者其他
如圍子部簇帳部親弩部皆趙范立額不相統攝又江

都有巡檢七泰興如皋巡檢各一以分巡要害甘泉縣

志載揚州禁廂軍之數與顧氏之說同并云禁軍四統
以六指揮每指揮五百人共三千人廂軍三統以九指
揮每指揮五百人又云強勇之屬有八曰使効曰歸正
曰楚州強勇口神勇曰敢死曰鎮淮曰馬效曰楚州雄
邊武鋒之屬有五曰楚州屯騎曰楚州武鋒曰楚州左
右曰安東宣威曰鎮江雄効敢勇之屬一曰精銳雄勝
之屬一曰必勝又有雄邊軍武定軍游擊水軍神武軍
護聖馬步軍水軍忠節軍保勝軍忠勇軍寧淮軍俱有
統制官轄之又有畱守揚境在江都者曰制勝右軍神

勁軍振武軍儀徵縣志載宋州禁軍二涪化四年選眞州廂軍之強壯者爲忠節軍慶厯中募眞州健勇者爲宣毅軍統於侍衛司四指揮領之額共一千七百四十人內忠節第七指揮五百一十人忠節第三十五指揮五百一十人壯武第八指揮三百一十人樓船指揮四百一十人廂軍六日奉化日梢工都日裝發日車軍日鹽車軍日新招梢工日揀中騎射內統於侍衛司或兼屯於州六指揮領之額共六千七百六十人內廣濟指揮四百一十人寧淮第七十五指揮四百一十人第七十六指揮三百一十人第七十七指揮三百一十人車軍指揮一百一十人清務指揮二百一十人土軍額共一千五十三人內沿江巡檢寨六十八人運河巡檢寨六十八人竹鎮巡檢寨三十三人忠勇軍統領一人其額兵一千人游奕軍元隸鎮江都統司嘉定八年揆戍眞州額共一千人忠武軍上官渙酉自儲糧餉招助防守額共五百人縣萬弩民兵號萬弩手紹興間召募稅戶充訓練一人部轄之義武民兵淳熙間詔每稅戶三丁取一以爲捍禦之備置總轄總首首領統率之嘉定六年詔縣令兼軍正兵無定額縣統九百人以上所言皆與史志多有踳駁異同然其說要皆有本故列於篇以俟

攷元至元十四年置江淮等處行中書省大都督府於揚州廿四年移治建康至十五年置淮東道宣慰司於揚州掌軍民及邊陲軍旅之事或兼都元帥府未幾揚州宣慰司省廿一年復置至正十一年置淮南江北行樞密院於揚州廿八年徙建康初世祖以揚州衝要重地置五翼馬軍砲手弩軍令親王託歡太子鎮遏揚州提調四省軍馬至元十五年分揚州行省兵於隆興府是年七月詔以塔爾海征夔軍之還戍者及揚州江西舟師悉付水軍萬戶張榮實將之守禦江中至元十七年復以揚州行省四萬戶蒙古軍更戍潭州至元十八年以哈必齊軍三千戍揚州至元十九年命唐古特於沿江州郡視便宜置軍鎮戍及諭鄂州揚州隆興泉州等四省議用兵戍列城是年四月調揚州哈必齊軍三千人鎮泉州至元二十八年八月畱蒙古軍千人戍揚州蒙古軍在揚州者九千人初議以三分爲率畱一分鎮戍史塔爾琿曰蒙古士卒悍勇畱一千人足矣二十三年二月詔改江淮江西元帥招討司爲上中下三萬戶府蒙古漢人新附諸軍相參作三十七翼高郵爲上萬戶府真州爲中萬戶府揚州泰州爲下萬戶府各置達魯噶齊一員萬戶一員典兵

揚州四萬戶已見于十四年是萬戶之制早經

前定至此始定為江淮三翼及上中下之制耳

一十五年調揚州省軍赴鄂

州代鎮戍士卒廿七年調泰州高郵兩萬戶府漢軍戍

寧國徽州廿八年調江淮省持默齊軍及漢軍二千人

於託歡太子側近揚州屯駐成宗元貞三年二月調揚

州翼鄧新萬戶府全翼軍馬分屯蘄黃又揚州有打捕

鷹房官捕戶七十二戶又通泰有打捕提舉司打捕戶

七百四十九戶隸淮東淮西打捕總管府屬宣徽院亦

皆兵籍也明初高皇帝都金陵時以揚州畿輔重地丁

西置淮海翼元帥府命大元帥繆大亨元帥張德林鎮

之庚子改淮海翼元帥府為江南諸處樞密院仍命繆

大亨同簽樞密院事已已以大都督府經歷陳瓘總制

真州軍事自後都司衛所定制罷行樞密院及總制等

官而於揚州儀真高郵置三衛徑屬中軍都督府其衛

所之制按明會典及續文獻通考衛指揮使一員正三

品指揮同知二員從三品指揮僉事四員正四品衛鎮

撫二員從五品衛指揮司掌軍旅防禦之事使同知僉

事考選掌管衛事凡世流襲替優給優養報都指揮使

司達所隸都督府

揚州儀真高郵等衛俱徑隸中軍都督府不隸都司

移兵部每

歲藩臬撫按察其賢否五歲一考選軍政廢置之一人

統衛事曰掌印一人練兵一人屯田曰僉書京操巡捕

出哨備禦軍器漕運諸雜務曰見任管事編諸行伍曰帶俸差操凡撥軍補軍替軍選軍募軍並統於掌印凡城池時葺浚之度其材力軍十三民十七鎮撫掌刑獄衛各領五所所設正千戶一員正五品副千戶二員從五品所鎮撫二員從六品所各領百戶十員正六品每百戶領總旗二人小旗十人大率五千六百人為一衛一千一百二十人為一千戶所一百二十人為一百戶有事征伐則令總兵官佩將印領之既旋則上所佩印於朝官軍各回本衛時既於揚州儀真高郵建三衛又於泰州興化置二守禦所時通州監各統百戶十及鎮撫等官與郡縣犬牙錯處以軍為民衛而軍有從征歸

附謫發著籍各衛俱以十分為率八屯種二守城更迭番休以均勞逸且耕且守蓋仿古屯營法為固圉策甚具自成祖遷都北平念留京根本重地於新江設水操軍以萬計而都御史督之自九江以抵蘇松通泰凡地方緩急寇盜鹽徒出沒聽調兵禽捕蓋綜江海諸務於事權至重是時衛所軍已有城守操江備倭諸役又永樂中始令民運糧儲于瓜洲給軍船脚價為兌運於是

有運糧軍歲一轉輸京師以為常正統十四年北邊有警又調揚州各衛所軍分春秋兩班更番入戍名曰京

操軍而卒伍疲甚其後軍政日益廢弛丁力困於誅求而屯田苦於兼并諸衛軍隸尺籍者相率逋逃亡耗居半其僅存者亡慮皆枵腹婁人倚月糧以餬其口又不能時給卽力稍自贍又不能當轉餉更戍無已之役與武弁婪者之日朘月削也雖歲有清軍勾補及屯政倉政諸令甲甚嚴而弊蠹叢生莫由究詰衛所軍之不可以復驅卽戎無論淮以南卽天下猶是矣正統未令府州縣招募丁壯爲民兵名快手或名會手而巡司故有弓兵俱有司率領操演明會典載揚州府所屬江都縣有萬壽巡檢司儀真縣舊江口巡檢司高郵州張家溝巡檢司時堡巡檢司興化縣安豐巡檢司寶應縣槐樓巡檢司衡陽巡檢司泰州西溪巡檢司海安巡檢司寧鄉鎮巡檢其通屬今不隸郡不載然兵壯止供衙門役使弓兵所緝里閭鳴吠及負擔輿販而已正德中薊盜劉六劉七等寇齊魯間轉掠江南襄陽所過屠城破邑殺撫臣遂率眾浮江東下泊狼山欲自通泰登岸還山東時總漕尚書張縉督兵守淮口賊不敢渡乃自通州泝流至九江又下南京往返者三操江兵愕眙無敢近而兵部侍郎陸完調沿邊諸鎮討之尾賊行至福山隔江而陳僅移檄往來通州城甚危忽夜半颶風大作賊舟覆溺死

無算完遣裨將襲其餘黨盡殲之以捷聞遂奏凱獻俘
勒銘狼山時人惡焉嘉靖初倭貢使相挺起爲變躡寧
紹諸郡已而市舶據海上不去而中國大猾王直毛海
峯以財物役屬倭中惡少行海上爲亂王子遂破黃巖
象山諸邑浙東騷動蔓延蘇松間其黨徐海屯松江柘
林始分掠江北甲寅犯如皋通州海州時承平久揚州
俗日漸紛華上下異悞偷安沿海備不復設猝聞變皆
望風奔潰賊卒不過數百人所至焚燒斬戮荼毒不可
道每戰賊輒赤體提三尺刀奔舞而前善設伏能以寡
擊眾反勞佚主客而用之遠近相傳恐言賊有神不可
與戰率蒲伏受僇而縣無城守者壽尤慘甚先是操江
臣以倭患急勢不能兼理海防軍務朝議於江南北設
二巡撫與提督操江畫地而守揚州三江會口以上操
江統之周家橋以下江北撫臣統之而都御史鄭曉始
以巡撫兼海防時知府吳桂芳爲言自倭犯並海郡縣
有城則守無城則殘使賊逾廖角嘴而漂北海犯鹽場
而南則如皋弗城爲可虞道南江而西舍舟而北犯口
岸則泰興弗城爲可虞風帆西下直抵西市則瓜洲弗
城爲可虞況海門僻處東偏爲海寇必由之所弗城安
恃乎撫臣然其議始奏築如皋泰興海門瓜洲四城逾

年城成民恃無恐乙卯倭猝薄揚州城民避不及被殺及溺死者數千人焚掠大東門外盡燒燬鹽堆而去府同知朱哀及高郵衛經歷晏銳以率兵禦賊死焉淮南江北大震於時衛所軍無所用而各州縣鄉團民兵或時時扼殺倭及嬰城時擊殺之始策東關建新城其明年參將王完伯率所部徐兗精銳兵守揚州設伏於鐵盤廠先引弱兵轉戰至伏所麾騎兵衝擊大破之賊稍戢又劉顯擊破之泗州而遁明年都御史李遂撫江北以土兵客兵俱脆弱疏調山西邊兵三千戍如皋明年賊大舉萬眾分道入遂與海防副使及諸將約曰賊業入海門必入如皋夫江淮根本在鳳泗賊若越泰州宜陵窺江都則天長以北震是唯遂自督禦咎弗在將吏瓜儀漕挽津滙南北襟吭又陪都之屏輔賊若壓黃橋奔秦興西擾卽諸重地危海道遊擊任之二路旣抗賊宜却出富安並海岸東馳我振旅淮安出其不意賊成禽矣畫既定部置諸將令聲援相倚角於是倭入丁堰鎮趨如皋遊擊邱陞擊敗之已又犯海安鎮副使劉景韶率邱陞兵追剿盡殲之賊果不敢西掠而折循富安並海隄東出李遂夜提師至淮城適所調青兗曹邳兵並集賊猝見官兵眾盛大駭遂麾突騎橫搏斬賊首十

餘級賊退據廟灣夜乘風竊舟去無何江南倭據三沙者千五百餘輩忽北犯通州邱陞戰歿民悼痛甚會副總兵劉顯以禦江南倭失利乃渡江赴援請自贖諸將欲拒弗納李遂令予卒助攻顯感奮乃首斫入賊壘壯士乘之賊潰圍走追攻之白駒場又追及之七竈毛家墩先後斬六百餘級奪器物無數賊逸竄海壘爲土兵格殺殆盡與三沙賊並殄散無遺類而江淮靖焉自是沿海並增置營戍設將領通州有副總兵及水營把總掘港有守備大河周橋各有守備一揚州有參將而儀真守備及三江口把總瓜洲營衛總隸操江如故所統兵或招募土著或以義烏東陽習水戰者充之自江達海各分汛地列戰艦嚴會哨所在疆屬碁布而倭以入犯鮮生還寂不窺海者幾三十年其後營兵制復浸壞凡土著兵率寡其有力者大抵詭寄以勢要挾將領臨閱期則僱丁壯習伎者虛應或多蓄傭奴居恒爲作百役臨時囑免其操戍當散餉則盡括以肥己而什三給之其力能修艫官船及以私船應募者爲耆民捕盜諸水兵皆聽役屬沒其月餉之半以爲治船費稍違拂則擅榜掠驅逐或更爲募補弗以白於主將主將弗敢問也浙兵性驕悍與土著者不相能時時擾閭左細民急

之則亡匿去難控禦蓋自戎政圯將官非納賄夤緣無繇進多者費千餘金勢不得不取之營伍以償借貸又歲有路遺交際諸當道主文胥吏有常例偏裨將月廩幾何勢不得不尅取之兵人尅取則懼叢怒則又於隊伍中逃亡詭寓其十之一而自哨隊伍長以下轉相仿效以彼此挾制毋敢發其有力者嚴繩下以法則眾喙蜂涌爲蜚語以聞於廉訪者亡何掛彈章若影響則連名牘具愬眾爲作證而互訐之將官或以之褫職或坐飛贓抵法後來益爲畏縮視營伍爲傳舍苟得利以圖復爲夤緣安望桓桓不二心之臣緩急出死力以爲國家乎江海故多劇盜其黠猾者以掠餘賂諸哨船輒故縱之諸鹽徒無慮皆其親戚子弟或者捕竄入其中倚兵船爲盜藪遇詰責嚴則取貧民被勾誘爲盜役者私鹽之勢卑力弱及不以時輸例賄者以邀功索賞沿江海所在皆然而淮南北其最著矣萬厯二十年倭首關白專其國山城君不能制遣二將清正行長以兵襲朝鮮之金山據之朝廷遣帥督兵征之師少挫遼左戒嚴而倭僞乞封貢爲緩師之計比遣使而惇驚益甚乃大集郡國兵若江南北浙東福建俱募兵船赴援議者謂倭不得志於朝鮮必分兵內寇若天津登萊淮揚將無

所不寇於是所增兵置堡嚴戍守如異時然營伍兵皆
惟怯甚與衛所卒無異幸倭不來來卽先亡魄委甲遁
耳知府郭光復乃申防倭十二議曰修城池繕軍器僉
門夫嚴保甲復副役謂凡里甲壯快等正役外許置副
役一名分工食之半演習以備補額兵練鄉兵屬竈勇
復沙船畱糧餉議召買阻險要諸建議皆舉行而撫按
臣復疏請於江中永生洲添水兵游擊一員統南北水
兵共千人以上下應援無南北彼此之諉疏報可又廿
五年復用言官議以總河臣兼漕務而江北專設督撫
臣治軍務蓋武備稍振焉會關白死倭將狼狽內顧遂
焚金山寨柵移輜重而去東征兵亦撤計是時揚州兵
制以明會典考之其督兵憲臣則有提督操江以副都
御史或都御史一員奉敕提督并巡視九江至鎮江蘇
松等處江道沿江軍衛有司盜賊之事皆屬焉成化九
年專督巡江後復令兼督操江官軍嘉靖十三年題准
沿江軍衛除浦子口原無水軍外其九江安慶儀真鎮
江太倉松江等處各照地方大小造船置器選熟知水
利兵快委官統領操防又議准長江上下往來船隻數
多中間盜賊鹽徒混雜難辨通行操江巡撫等及安慶
儀真守備官并府州縣官查驗仍各置船隻撥兵快巡

言修揚州府志 卷之二十三
選又題准巡江衙門定委各府同知兼管巡捕統率壯
快常川操守遇警同衛所官軍緝捕不許別項衙門差
委又題准沿江巡檢弓兵府州縣照額僉補原設哨船
若有損失於操巡衙門贖罰銀內動支打造給兵領價
又奏准沿江府州縣及同知縣丞文憑內皆註明管理
巡捕字樣令專聽操巡衙門節制有巡江御史上下江
舊差御史二員一員自龍江關上至九江一員自龍江
關下至蘇松等處嘉靖七年題准兼督安慶儀真揚州
淮安軍衛有司擒治鹽徒有總理漕運兼提督軍務巡
撫鳳陽兼河道一員初永樂間設漕運武臣景泰二年
因漕運不繼特命都御史總理與總兵叅將同理其事
遂兼巡撫廬鳳淮揚四府徐和滁三州成化八年分巡
撫總漕各設一員九年復舊正德十三年又各設十六
年復舊嘉靖三十六年以倭警添設提督軍務巡撫鳳
陽都御史四十年又歸併萬厯七年兼管河道至廿六
年併漕運於總河始分設巡撫於泰州有淮揚海防兵
備副使一員駐泰州嘉靖三十三年置整飭淮揚江防
仍分管揚州儀真高郵等衛泰州鹽城通州等所京操
官軍其營務將領則有泰州巡撫軍門中軍營向以鳳
陽巡撫兼總督漕運駐淮安府中軍則以都司領之自

分建巡撫於泰州其總漕中軍營仍畱淮安因別置標營於泰州又謂之內中軍擇廢閒將領統其眾原設兵七百員名後增一千餘員名有泰州海防道中軍營嘉靖三十三年既設海防道駐泰州原設官兵一千二百員名擇各衛指揮賢能者爲中軍後減至四百九十員名萬厯二十五年又增三百名二十八年復裁去八十名止存七百餘員名有提督狼山副總兵官嘉靖三十三年既設海防兵備副使其時並建參將爲分守通泰海防至三十七年倭益甚乃改參將爲提督狼山副總兵官與海防道相策應明會典云狼山副總兵水路自

瓜儀周家橋掘港直抵廟灣雲梯關陸路自通泰淮揚天長直抵鳳泗各參將守備把總等官悉聽節制水陸營兵八千餘有揚州營參將初揚州有坐營指揮一員操習馬步隊正軍其教場在小東門外嘉靖間以倭變增築新城遂包隸城內於教場右置參將府置參將一人後多以游擊代署操演水陸軍馬以防禦外寇凡衛所等官皆以軍法節制之儀真守備洪武初議者以儀真當要害宜建統帥以臨轄軍衛始權置守備一員於儀真初以都督充後或以都指揮指揮等充咸授敕諭宣德年裁成化初復置舊額官捕者兵共六百六十八

員名後增減無常明會典云儀真守備駐儀真江口專管江北備倭捕盜事務三江會口把總嘉靖四十二年南兵科范宗吳請上自九江下至江南圖山江北三江會口每年防春調取各府州縣健勇二千餘名徵銀雇募水兵防守明年兵部覆水兵內棟選精壯者四百名分爲二班一班專守江南一班坐委指揮協守江口隆慶三年都御史吳時來題請三江會口設把總一員統領之額官兵七百五員名瓜洲營衛總舊設陸兵與常操民壯各一百七十五名水兵四百八十一名巡江軍舍八十名大小戰船五十餘隻萬曆二十六年議增水兵三百名沙船十隻選指揮一員統領共爲三大哨一駐沙河港一駐花園港一駐馬頭爲犄角應援之勢其昔年所謂脚斛二行騎勇則前已一切罷去令其納銀以充兵餉後改儀真守備爲瓜儀守備督率操防永生洲游兵把總萬曆二十五年因倭警及江海寇盜出沒知府郭光復議以永生洲中踞大江置游兵把總統兵一萬人後復題革鎮江參將爲永生洲參將周家橋把總在泰興周家橋永生洲以下俱屬通州但其時揚州營制聯絡一氣今雖不屬揚州未便刪原因兌糧於此每年撥泰州兵快一百名與彼處民兵一百名防守後因倭變以泰興周家橋乃沿海衝要

之區據守所當先須設把總堵截海口遂設把總一員
統兵三百後復增置百餘人又添福船四十餘隻掘港
守備在掘港場迤東五十里爲倭寇登岸要地舊唯揚
州衛遣指揮千戶防禦嘉靖四十四年倭夷大舉都御
史鄭曉奏易把總三十八年都御史李遂復奏易守備
統東西二營大河營把總在海門縣境內倭難後巡鹽
御史崔棟築東西場二堡東堡內嘉靖間設大河把總
官一員領兵千人鎮守明會典云大河口嘉靖三十七
年以鹽城把總移駐於此萬厯間裁減狼山把總一人
駐通州亦嘉靖中所設通州副總兵中軍所統陸兵爲
陸營而把總則專管水寨操演明會典云狼山水兵把
總嘉靖三十九年添設又游兵把總萬厯三年添設駐
劄上新河白狼山至圖山與通泰合兵巡哨以上副總
兵叅將游擊守備把總等官按明會典皆於都督都指
揮指揮等官內推舉充任此歷代揚州設兵之大畧也

重修揚州府志

卷之二十三

三

重修揚州府志卷之二十三

